

Xlimactuy xcarta huantu tzokli San Pedro

XAPAJMUJUN TACHIHUIN:

Acxni acu titzúculh lipahuancán Cristo, xlipacs huanti xlipahuankoy xlacán xkalhkalhimaqó pi ni makas namín Quimpuchinacán xlimaktuy. Huampi quilhtamacú xama, chu pi ni xlakchama quilhtamacú lantla namín, lhuha huanti atuyá tzúculh puhuankoy, chu xpuhuankoy pi nialh ucxni catímilh. Hasta taxtukochá makapitzín huanti c-xlacatjincan canajlanín tzúculh lichihuinankoy pi nialh ucxni catímilh Quimpuchinacán. Huá xpalacata litzoknikoça yuma carta yama huanti chuná xlichihuinamako yuma talacapastacni, chu antá huanikocán pi Dios ni lilhcāhuiliy quilhtamacú xtachuná lantla licatziyahu quin, sampi “huantu xpalacata Dios aktum quilhtamacú xlá limaxtuy xtachuná titaxtuy aktum mīlh cata, chu lantla titaxtuy aktum mīlh cata, xlá xtachuná limaxtuy cumu lampala aktum quilhtamacú titaxtunīt”. Chu masqui tasiyuy pi Quimpuchinacán lipēcua lantla makapalama, huá chuná lilama sampi Dios ni lacasquín ti nalaktzankay, chu ni namatzankānican xtalakalhín, huampi huata pacs calaktalacatzuhukolh, chu calipahuankolh Cristo (3:8-9).

Pedro lipaxuhu xakatlilacankoy ti tzoknikoy xcarta

1 Quit Simón Pedro huanti Jesucristo quililacsacni xapóstol, chu cscujni nacuán ti namaakahuaníy xtachihuín. Luhua cana lipaxuhu ccatzoknimán yuma quincarta xlipacs huixín huanti na lipahuangít lantla quin yama lilakatit xtachihuín Cristo huantu quincamaxquinitán, chu huantu licanajlanitahu sampi catziyahu pi tama Quimaakaputaxtinacan Jesucristo, huanti na quidioscán, xlicana pi talipahu, chu pacs xtalulóktat huantu huanit. ²Clacasquín pi Dios xataxajni cacamaxquitilhán xtasiculanatlahuán, xahuá aktziyay, chu lipaxuhu latámat

huantu tlan likalhiyátit pi lakapasátit Dios, chu Quimpuchinacan Jesús.

Huantu Dios ucxilhputún c-xlatámat huanti lipahuankoy

³Cumu Dios kalhiy tlanca xlitlihuaka, xlá pacs quincamaxquinitán huantu namaclacasquínahu laquimpí tlan akstitum nalatamayahu catuxáhuat, chu xman huá nalakachixcuhuiyahu; xlicana pi makamaklhtinahu yuma litlihuaka, xahuá lipaxuhu latámat cumu lakapasnitahu xatí chixcú tama Jesús, chu huá man quincataninítan laquimpí na nakalhiyahu c-quilatamatcán yama tlanca cacni, chu akstitum latámat huantu xlá kalhiy. ⁴Caj xpalacata

huantu aya quincamaxquinitán, chuná xlá limalulokma pi pacs namakantaxtiy huantu malacnunit; chu huantu Dios quincamaxquiputunán, xlicana pi tlanca xtápalh, sampi caj xpalacata huantu malacnunit tlan nalilakchanahu yama lipaxuhu xlatamat Dios, chu na natitaxtuniyahu xlipacs huantu lixcajnit talakalhín huantu huí catuxáhuat, chu quincalactlahuayahuputunán. ⁵Huá xpalacata ccalihuaniany pi huixín huanti canajlayátit huantu Dios malacnuy, na juerza catlahuanítit pi yama mintacanajlacán huantu huixín kalhiyátit, atzinu lacuan chixcuhuín nacatlahuatilhayán, chu lapí xlicana akstítum latapaputunátit, na luhua miliputzatcán lantla tlak tlan naakataksátit huantu Dios huan c-xtachihuín. ⁶Cumu luhua lihuana akataksátit nahuán, man catziyátit lantla namatlihuaklhátit mintalacapastacnicán, chu nitú nalitlahuayátit huantu lixcajnit talakalhín. Huixín nalitaxtuyátit lacuan chixcuhuín huanti nitú lacapala lisitzikoy huantu ucxilhkoy, usu tlahuanikocán, na chuná lantla nalicacninanianyátit Dios milatamatcán. ⁷Sampi huanti xlicana lipahuankey Dios ni pala chatum ti lakmakankoy, huata pacs lakalhamankoy xlipacs chixcuhuín, chu na luhua xlasquinca pi hua yuma talakalhamán nacamaxquiyán litlihuaka laquimpi acxtum nalapaxquiyátit cumu linatalán.

⁸Hua palapi huixín pacs kalhiyátit huantu quit ccahuanimán, chu akstítum makantaxtipátit, nialh caj xman chunatiyá catilatapátit, na ni pala caj luhua xman chunata lactlahuapinitántit quilhtamacú lantla lipahuanátit Cristo. ⁹Huampi yamá huanti ni kalhiy huantu Dios quincamaxquiyán xlitlihuaka, luhua xtachuná quitaxtuy lampala cajcu lakatzín, usu ni tancs lacahuánán,

sampi patzankakonit pi aya xchakamakanicanit xlipacs xtalakalhín huantu xtlahuanit. ¹⁰Natalánin, huá xpalacata quit ccalihuaniany, cumu Dios catasaninitán, chu huá man calacsacnitán laquimpi xlaskatán nahuanátit, chu nalipahuanátit, pus ankahlín calitzaksátit namalulokátit c-milatamatcán pi xlicana, sampi lapí chuná natlahuayátit tancs cacatzítit pi niucxnicú catilacatayátit. ¹¹Chu c-akapún luhua cana lipaxuhu nacalimanucanátit, antani xaliankalhín mapaksinámaj nahuán Quimpuchinacan Jesucristo huanti quincaquilakmaxtunitanchín.

¹²Masqui aya catziyátit huantu quit ccahuanimán, chu luhua akstítumá lapátit, huampi xaliankalhín naccalimaakatzankayán laquimpi akstítum camakantaxtítit yama xtaluloktat xtalacapastacni Dios huantu ccalitakalhchihuinanitán. ¹³Cmakcatziy pi luhua chuná quiltiláhuat xlimakuá clamajcú catuxáhuat laquimpi ankahlín naccahuaniany pala tú nitlán tlahuapátit. ¹⁴Masqui xlicana pi Quimpuchinacan Jesucristo stalanca quimacatzininit pi nialh pala makas quilhtamacú nacakxtakmakán yuma catuxáhuat, ¹⁵huampi xlimakuá clamajcú, cpuhuán pi juerza nactlahuaniany pi lihuana naccamaxakataksniyán huantu luhua militlahuatcán laquimpi masqui aya cninitá nahuán, huixín ni catipatzankátit huantu ccahuanianitán nahuán.

Pedro man ucxilhniit pi Jesucristo kalhiy tlanca xlitlihuaka

¹⁶Xlipacs yama tachihuín huantu ccalitakalhchihuinanitán lantla kalhiy tlanca xlitlihuaka, xahuá xlicacni Jesucristo, xlicana pi ni caj chunata ccaliaksahuimán, usu napuhuanátit pala caj takalhchihuín tu caj

xatalaccaxtlahuaquín, huampi huata quilakastapucán man cliucxilhnitahu huantu xlá tlahuanit lactlanca licacni xtascújut. ¹⁷Quin lacxtum xactayahú Jesús yamá quilhtamacú acxni talakpalikolh lantla ankalhiná xtasiyuy, chu Quintlatican Dios stalanca quincalimalacahuánin yamá tlanca cxkakánat, xahuá licacni huantu xkalhiy masqui ni xtasiyuy, xahuá acxni takáxmatli xtachihuín acxni chuná huá: “Huá yumá quincam huanti luhua cpaxquiy, chu clipaxuhuay xlatámat.” ¹⁸Quin stalanca cxaxmatnitahu yamá xtachihuín Dios huantu minchá c-akapún, sampi lacxtum xactayahú Quimpuchinacan Jesús yamá lacatum kastín xasantujlaní antani xactactanitahu.

¹⁹Xlipacs yumá huantu quin cucxilhnitahu lacatanacs litaluloka huantu xalakmakán profetas titatzokchá xamakan quilhtamacú, chu luhua tlan pi huá tamá tatzoekni huixín luhua quilhpaquiyátit acxni likalhtahuakayátit. Pus tamá xtachihuínacan profetas huantu tatzoektahuilanit luhua xtachuná litaxtuy aktum mákskot huantu xlimakaxkakánat xuanit hasta yamá quilhtamacú napulhachá yamá tlanca matancústacu huantu xkalhkalhipátit laquimpi nacamakskoniyán c-minacucán. ²⁰Huampi luhua cuíntaj catlahuátit huantu naccahuaniyán: Xlipacs huantu xamakan quilhtamacú titzokuilichá profetas c-xlikalhtahuakacán, ni pala çatum ti tlan caj xacstu xtapuhuan náliakataksa huantu luhua huamputún. ²¹Sampi yamá lakmakán profetas niucxni tú lichihuínankolh huantu caj xacstucan xtalacapastacnicán, huampi huata huá xtapaksinikoy, chu xlichihuínankoy xtalacapastacni Dios, sampi huá Espíritu Santo xmapuhuanikoy lantla nahuankoy.

**Hasta xamakan quilhtamacú
na xuilakó huanti caj taksanín
xmastakoy
(Judas 3-13)**

2 Hasta lantla xamakan quilhtamacú c-xatayat Israel na xlamakó makapitzín huanti xuankoy pi na profetas, huampi caj taksanín huantu xmasiyukoy. Na chuná quitaxtumá nahuán c-milakstipancán, sampi lhuhua huanti nalitaxtukoy xtachuná lacuan makalhtahuakananín, huampi caj akskahuinamakó nahuán. Yumá makalhtahuakananín c-milacatinacán masqui namasiyukoy pi lampala luhua akstitum lamakó, xlacán xman huá masiyumakó nahuán huantu nalactlahuayahuanikoy xtacanjalcán lhuhua, chu chuná lakmakamakó nahuán Quimpuchinacán huanti huankoy pi xlakmaxtukonit. Huampi huanti chuná lamakó, xlicana pi caj malacapalimakó quilhtamacú lantla Dios namapatinikoy. ²Lantla lixcajnit xlatamatcán masiyumakó nahuán, lhuhua huanti aya xtzucukonit lipahuankoy Cristo na nalakatikoy huantu xlacán masiyumakó, chu hasta na chuná natzucuy tlahuakoy huantu xlacán masiyumakó nahuán, chu caj xpalacatacán lhuhua huanti ni lipahuankoy Dios calahuá nalikalhchihuínankoy yamá akstitum latámat huantu Jesús quincamasiyunimán nalilatamayahu, sampi xman huá kalhiy xtalulóktat. ³Caj lantla xlacán lakatilacamakó nahuán nakalhikoy, chu namaakstokuilikoy lhuhua tumín, na calitakalhchihuínankoyán huantu caj catuhua takalhchihuín laquimpi chuná tlan nacaliakskahuimaklhtiyán tumín. Huampi fuerza nalakchán quilhtamacú acxni tlan napatinankoy caj xpalacata huantu nitlán xtatlahucán natlahuakoy, sampi hasta xamakana quilhtamacú

aya lilhçakocanīt lantla luhua
natamakstuntlahuakoy.

⁴Milicatziṭcán pī Dios nī pala tzinū
matzankanānikolh yama ángeles
huantī kalhakaxmatmakankolh
xlimapaksín, chū tlahuakolh talakalhín,
huá limacankolh c-pupatīn, antá
chīhuilikolh antānī luhua aktzisa,
chū makakalhīmakó hasta nīlīhuayá
nachín quilhtamacū namakalhapalikoy,
chū namapatīnikoy. ⁵Na chuna
acxnī yama makan quilhtamacū
xuilacā, yama huantī xuilakó caj
xman lakachixcuhūmakankolh
Dios, chū nī cuīntaj tlahuanikolh
huantū xliakchihuīnanimakó Noé, hua
xpalacata Dios nīalh lay tapatikolh, chū
macámilh muncáclat, masputukolh
xlipacs tī xlamakó catuxáhuat, caj
xman hua Noé, xahuá kalhatujun
xlinatalán lakmaxtukolh sampi
xlacán akstītum xtilatamakōnīt
c-xlacatīn Dios. ⁶Na chuna lītum
Dios na mapatīnikolh xlipacs
huantī makān xuilakó c-xacachiquīn
Sodoma, chū Gomorra, sampi maktum
lalcuyuhuīlikolh, chū cata caj
xalhaca yama cāchiquīn tamakáxtakli,
laquimpī nalīlacapastackoyachá
nalīcatziṭahuīlakoy pacs huantī alīstālh
na lixcájnit natalamaputunkoy
pī juerza namapatīnikocán hua lapi
nī natalakaspittayakoy. ⁷Caj xman
chātum chixcū huantī xuanicán
Lot lakmáxtulh, chū nī mapatīnīlh,
sampi Lot luhua xliīpuhuán lantla
lixcájnit xlamakó huantī xtlahuamakó
caxatūcahua talakalhín, sampi Lot
luhua akstītum xlamā c-xlacatīn Dios.

⁸Yama akstītum chixcu Lot
ankalhīn xliīpuhuán caj xpalacata
yama lixcajnit talakalhín huantū
chalī chalī xmakucxilhma, chū
xmakkaxmatma, sampi xlá antá
xlamā c-xlakstipancan yama calāhua
chixcuhūn. ⁹Quimpuchinacán
catziy lantla nalakmaxtukoy xlipacs

yama huantī xlicāna xlá ucxilhkoy
pī maktum macamaxquikōnīt
xlatamatcán, huampī xlá na nī
patzankanikoy huantū tlahuakōnīt
xlipacs yama huantī lixcájnit lemakó
xlatamatcán laquimpī namapatīnikoy
acxnī nalakchán quilhtamacū
nasputcán, chū nacatatlauhay cuenta
xlipacs tachixcuhūtat. ¹⁰Dios atzinū
līpecua namapatīnikoy yama huantī
tajitá tamastakonīt c-xtatlauhaputu
xtiyatlihuacán, chū lixcajualán,
na chuná huantī lakmakankoy,
chū nītū liucxilhkoy xlimapaksín
Quimpuchinacán, huampī xalihuacá
tama makalhtahuakanānīn huantī
caj aksahuīnamputunkoy, xlacán
puhuanikoy pī luhua laskalalán, huata
tlancaj makcatzikocán, nī pala tzinū
puhuanikoy pala napecuanikoy acxnī
lixcájnit tū quilhpatanunikoy yama
lalcīpecuanīt spīritu ti malānankoy
caunīn huantū quin chixcuhūn nī lay
ucxilhahu. ¹¹Masqui ángeles xala
c-akapūn huantī tzinū tlak kalhīkoy
lītlīhuakā nī xahua chixcuhūn
xala catuxáhuat, huampī xlacán nī
pala tzinū puhuanikoy pala calāhua
nalīchihuīnankoy tama lactlanca
spīritu c-xlacatīn Quimpuchinacán
xtachuná lantla tama aksanīnanīn
makalhtahuakanānīn tlahuakoy
acxnī lixcájnit lichihuīnankoy acxnī
makstuntlahuakoy.

¹²Yama chixcuhūn luhua xtachuná
lītaxtukoy lantla takalhín huantī nī
akatakskoy huantū tlahuakoy, caj xman
huá makantaxtikoy c-xlatamatcán
huantū makcatzikoy xmacnicán. Chuná
cāhuaniyān sampi xlacán luhua
lixcájnit līkālchihuīnankoy huantū nī
pala akatakskoy, chū nī lakapaskoy.
Pero nalakchán quilhtamacū
acxnī xtachuná naakspulakoy
lantla akspulakoy animālhna xala
caquihuīn huantū chipakocán
laquimpī namaknikocán, ¹³sampi na

namapatinikocán xtachuná lantla
xlacán mapatinikonit amakapitzín.
Yama nī lacuan makalhtahuakananín
lakatikoy lipaxuhuakoy huantu nī
mininikoy masqui stalanca catzikoy
pī nī makas nalipatinankoy. Masqui
yuma akskahuinanín calakanachán
antqni huixín huanti lipahuanátit
Jesús tamakstokátit lakxtum
huayanátit laquimpi nalitasiyukoy
la lactlan chixcuhuín, iluhua tlanca
limaxaná caquitaxtuniyán, sampi
tuncán stalanca tasiyuy lantla caj
caakskahuiputunkoyán!

¹⁴Yumá nī lacuan chixcuhuín nī
lay ucxilhōy chatum puscat pala
nī xlacán xtlahuakōlh puhuankoy,
niucxnī tlakuankoy lantla tlahuakoy
talākahlīn. Luhua catzīkoy lantla
akshahuimīkoy, chū lactlahuayahuakoy
yamá huanti nī naj luhua tlihuaka
kahlīkoy xtacānajlacán, xahuá caj
xmān huá luhua skálalh līcatzīkoy lantla
nakalhīkoy tūmīn sampi c-xnacucán
luhua chuná līlacapastackoy. Yumá
luhua xlīlat lakchānkoy capatīkōlh
xlipacs huantu nalimāpatinīkocán.

15 Xlacán aktzankatayakōnīt, sampi makaxtakyahuakōnīt huantu xaakstītum tiji, huata hua kantikoy xtáyat xamakán xlatamat profeta Balaam xcam Beor, yuma profeta titlajapútulh lhyhua tumīn caj xpalacata natlahuay huantu nialh lakchán, 16 huampi lilacaquilhnica xpalacata xtalakalhín. Yama xatzi axnu huantu xpuama, chihuínalh xtachuná çatum chixcú, nialh máxquilh talacasquín akklakú natitlahuay huantu ni xlitláhuat huantu xliaktzankatayama.

¹⁷Tamā aksaninanin
maḵalhtahuakananin xtachunā
lītaxtukoy aktum pulhman
taxtunū huantu nialh taxtunān,
usu xtachunā lītaxtukoy puchhni
huantu lalīhuān snoklén un; caj
xpalacata xtalakalhincān huantu

tlahuamāqō namacancōcān lacatum
tapaklhūtīt antānī luhua aktzisa
laquimpī antā napatīnankoy tū nī anān
xtamactat quilhutamacū. ¹⁸ Xlipacs
xtakalhchiuincān masqui luhua
huantu huankoy, chū palacsactukoy
huantu atzinu tlan takaxmata, huampi
huantu huankoy nītū xlakasi, chū
huī huanti kalhakaxmatkoy huantu
lichihuīnankoy hasta akatakskoy
pī huata tlan natalakaspittayakoy,
chū nalīlatamapalakoy huantu
limakapaxuhakoy xtiyatlihuacān,
chunā chū akskahuimīkoy,
chū makapuhuankoy pī tlan
calatamapalakolh huanti masqui
acu takalanā lakmakankolh
xalixcainit xtalacapastacnicān huantu
xlilaktzankatayakonit. ¹⁹ Xlacān
huanikoy xlimakalhtahuakatcān pī
namaktayakoy laquimpī nakalhikoy
laktāxtut masqui huata huā xlacān
nā chunā tamastānikonit xalixcainit
talacapastacni; sampi xlipacs
huanti makatlajakonit xalixcainit
xtalacapastacni huā ankahlīn
mapaksikoy. ²⁰ Milīcatzītcān pī
xlipacs yamā huanti lakapaskonit pī
Quimpuchinacan Jesucristo xlicānā
huā quimākaputaxtinacān, cumu
lipahuankoy, xlacān aya tītaxtunikonit
c-xlimapaksīn xlipacs huantu līxcainit
talakahlīn huantu maaktzankānān;
huampi lapī tamastakoy
calakchimpalakoy tamā līxcainit
xtalacapastacnicān, xlicānā pī xalihucā
tū nītlān akspulakoy c-xtalatamancān
nī xahua huā lantla xakasiyā. ²¹ Sampi
huata xatlān xtiqūitaxtunikolh
pī niucxni xtilakapaskolh huantu
xaakstītum tiji, sampi cumu chū aya
lakapaskonit huata tū tlahuakoy
huanchū caj akxtakmakankoy
yamā xatlān xlimapaksīn Dios
huantu maxquīqōcā. ²² Huampi
c-xlatamatcān tamā huanti huankoy pī
nā lipahuankoy Cristo, huampi alistalh

akxtakmakankoy, lacatanacs likantaxtuy yama xlicana tachihuín huantu chuná huan: “Chichí laktaspitpá xpatlánat laquimpi amaktum nahuapalay, chu paxni huantu acu lihuana paxikoça, caj lipuntzú tzucupalay lipaxa putlín.”

**Lantla naquitaxtuy acxni
namimpalay xlimaktuy
Quimpuchinacán**

3 Nalanín, hua yuma xlimactuy quincarta huantu quit ccatzoknimán, xlipacs mactuy quincarta clacasquín lihuana naakataksátit huantu ccalitakalhchiuín namán lantla luhua akstítum nalatapayátit.
²Na clacasquín pi lihuana calacapastáctit huantu xamakan quilhtamacú tilichihuín nankochá yama xasantujlanín profetas, xahuá yama xlimapaksín Quimpuchinacán huanti quincamaakaputaxtiyán, huatiyá tú calitakalhchiuín án xapóstoles huanti xlá xlacsackonit.

³Huampi na clacasquín lihuana cacatzitahuilátit pi acxni luhua aya talacatzuhuimá nahuán quilhtamacú lantla namimpalay Quimpuchinacán, luhua laclixcajnit chixcuhuín lamakó nahuán, huanti caj xman nalilatamakoy xalixcajit xtatlahucan, nitlán xtalacapastacnicán, chu caj lantla likalhakamamamakó nahuán.
⁴Lhuuatá nakalhasquininankoy: “¿Lántla yumá quitaxtuy, chanchu tú timalácnulh Cristo namakantaxtiy pi namimpalay xlimaktuy catuxáhuat? Sampi makasá lantla nikonit quinatlatnacán huanti chuná xlichihuín nankoy, chu chunatá ni kantaxtuma, huatiyá lantla huí quilhtamacú hasta lantla timalacatzuquica.”
⁵Yumá chuná huankoy sampi patzankaputunkoy lantla milh muncáclat, pi makan quilhtamacú ucxlata xuí akapún, chu cumu pacs chúchut xuí c-xokspun tiyat

Dios limapaksín alh pi tánuj catahui chúchut laquimpi natasiyuy tiyat.
⁶Chu alístalh huatiya litum tama chúchut Dios limacámilh muncáclat, chu limasputuhuilikolh pacs huanti xlamakó acxni yama xamakan quilhtamacú.
⁷Huampi yuma akapún, xahuá catiyatna huantu quin puhuilahu calanchuj quilhtamacú, aya lipulhcacanit pi hua lhcúyat nalimalaksputucán.
Xlicana pi chuná naquitaxtuy sampi hua Dios chuná limapaksinanit pi hua tama lhcúyat namasputuhuilikoy chixcuhuín acxni nasputa catuxáhuat, chu na acxni yama quilhtamacú Dios natatlahuay cuinta xlipacs huanti lixcájn tilatamakolh laquimpi namapatinikocán.

⁸Xahuachí nalanín, niucxni tipatzankayátit pi huantu xpalacata Dios, aktum quilhtamacú xlá limaxtuy xtachuná lantla títaxtuy aktum milh cata, chu lantla títaxtuy aktum milh cata, xlá xtachuná limaxtuy lampala caj aktum quilhtamacú.
⁹Huampi ni xpalacata pala Cristo caj luhua chuna catziy mamakapalima lantla namakantaxtiy huantu malacnunit lantla namimpalay xlimaktuy, chuná lantla puhuankoy makapitzín, huata xlá caj quincamakakalhiman laquimpi nalipahuanahu, chu ni naaktzankayah; sampi xlá ni lacasquín pala tí naniy, chu naaktzankay, huata lacasquín pi xlipacs tachixcuhiyat xlaktalacatzuhuikolh Dios xlimakuá lamakolhcú.

¹⁰Acxni nalakchán quilhtamacú lantla namimpalay xlimaktuy Quimpuchinacán, caj xalán namín acxni ni liacatzihuilaca, xtachuná lantla liacatzikoy kalhananín acxni catziśn minkoy kalhanankoy.
Acxni chá akapún, xahuá xlipacs huantu anán catiyatna nalactlahuakocán xtachuná la junnu minachá tlanca un huantu lipecuá macahuán, xlipacs

huantu huij nahuán catiyatna putum
nalachcuyuhuilkoacán laquimpí
nialh tú namakxtakkoy, xahuá pacs
huá Dios namakalhpalikoy, chu
namaxokonikoy tachixcuhuítat lantla
lakchankoy, chu lantla latamakonit.

¹¹Cumu aya catziyátit lantla
namalaksputucán yuma catiyatna,
ixlicana camininiyán pi luhua
akstítum calatapátit c-xlacatín Dios,
chu akstítum cacacninanitit! ¹²Huixín
ankalhín cakalhkalhithauilátit yama
quilhtamacú acxni Dios natlahuay
cuenta, chu calakpuhualacapítit pi
aya xláchalh. Acxni nalakchán yama
quilhtamacú xlipacs huantu huí, chu
tasiyuy c-akapún, xahuá huantu anán
catiyatna, putum nalilakstalankoy
yama lhcúyat caj xpalacata lipecua
xlíchichí huantu nalilhucyucán.

¹³Huampi quin huanti lipahuanahu
Cristo ankalhín kalhkalhimaahu yama
xasasti akapún, xahuá xasasti catiyatna
huantu Dios quincamalcuninítan
pi naquincamaxquiyán, sampi tancs
catziyahu pi xlipacs huantu antá huí
pacs tlan, chu akstítum nalatamacán.

¹⁴Natalanín, huá xpalacata
ccalihuaniyán pi xlimakua
kalhkalhipátit acxni nacamaxquicanátit
yama lipaxuhu latámat, pus juerza
catlahuanítit laquimpí acxni namín
Cristo xlá nacamanoklhuyán
pi huantu akstítum lapátit, chu
nitú limaxcajualipátit talakalhín
milatamatcán, huata tlahuapátit
nahuán huantu nalimakapaxuhuayátit.

¹⁵Xahuá tancs cacatzítit pi lapí Dios
lipaxuhu quincakalhkalhímán,
chu ni naj min Quimpuchinacán,
huá chuná litlahuama laquimpí
chunacú nakalhiyahu quilhtamacú
pi pacs calipahuahu laquimpí

tlán naquincamaakaputaxtiyán.
Xahuachí ccatziy pi Pablo, yama
quintalacán ti luhua cpaxquiy, na
maklhuuatá catzokniyán xcarta,
chu na hua yuma tastacyahu xlá
calitakalhchihuinanán chuná lantla
Dios maxquínit tastácat. ¹⁶Xlipacs
xcarta huantu xlá catzoknaninítan
huatiyá yuma tastacyahu huantu
lihuana camasiyuniputunán, masqui
xlícana pi lacmanuy makapitzin
tachihuín huantu juerza lactuhua,
chu ni luhua lay akatakskoy tuncán
yama huanti ni luhua lalskalala, chu
huanti tzankanikoy talacapistacni,
xahuá tacanajla, huata xlacán
liaklhuuatnankoy, chu nialh chuná
akatakskoy lantla quitaxtuy, na chuná
tlahuakoy xamakapitzi xtachihuín
Dios huantu tatzoktahuilanít
c-Likalhtahuaka, huampi xlipacs huantu
tlahuakoy xlicana pi caj xacstucán
putzamakó huantu naliktzankakoy.

¹⁷Natalanín ti ccalakalhamanán,
cumu huixín aya alicatziyátit
xlipacs huantu hua chú
ccalitakalhchihuinanítan, pus
luhua skálalh calatapátit, chu
catamaktakálhtit laquimpí ni
nacaljakskahuimiyán huanti calahua
xtayatcán, tama huanti laclixcajnít
xtalacapistacnicán chixcuhuín,
chu nitú nacalactlahuayahuyán
antaní xaakstítum huixín yátit.

¹⁸Huampi clacasquín pi atziní
lihuana calakapistit xtalacapistacni
Quimpuchinacan Jesucristo, xahuá
tlak camalihucátit laquimpí akstítum
nalilatapayátit xtapáxquít. iHuá
camaxquihu cacni Quimpuchinacán
calanchuj quilhtamacú, chu
caxanilihuayaj xtihua! Chuná calalh,
amén.